

BAB V

KARYADESA

5.1 Pendahuluan

KARYADESA merupakan sebuah lagi projek yang diadakan oleh RISDA dalam usaha memperbanyakkan lagi projek bagi wanita-wanita pekebun kecil getah, khasnya dalam projek-projek ekonomi agar dapat menambahkan pendapatan keluarga pekebun kecil. Projek-projek ini san diambil berat oleh RISDA untuk mencapai tujuannya memperbaiki kehidupan pekebun kecil secara menyeluruh.

5.2 Sejarah KARYADESA

Karyadesa merupakan sebuah projek yang mula ditubuhkan pada 1hb. Mac 1981 di bawah bahagian latihan. Karyadesa mempunyai sejarah sendiri iaitu ianya merupakan cawangan Desabakti. Desabakti merupakan sebuah lagi projek RISDA dalam usaha untuk memperbaiki keadaan hidup pekebun kecil getah yang ditubuhkan pada tahun 1979.

Desabakti mempunyai tujuan untuk melahirkan usahawan-usahawan sebagai pelupur pembaharuan kepada masyarakat pekebun-pekebun kecil getah. Desabakti merupakan sebuah projek yang melatih anak-anak pekebun kecil samada lelaki atau wanita dalam perkara-perkara seperti

- i. Perusahaan "cottage" seperti latihan menjahit "uniform" sekolah rendah dan menengah
- ii. Latihan menanam benih getah dalam "polybeg"

- iii. Latihan mencantun pokok-pokok
- iv. Latihan penanaman tebu
- v. Latihan merumput, membaja memotong dan merawat daun
- vi. Latihan petak cambahan

RISDA tidak mengenakan syarat-syarat yang ketat untuk menjadi ahli Desabakti tetapi mahu mengambil anak-anak pekebun kecil getah yang tercieir dari persekolahan mereka dengan tujuan menjadikan mereka sebagai usahawan di desa dan secara tak langsung mahu mengurangkan penghijrahan dari desa ke kota. Umur peserta hendaklah sekurang-kurangnya 15 tahun ke atas.

Desabakti mempunyai struktur pentadbirannya sendiri iaitu terdiri daripada satu pegawai kerja, lima penolong pegawai RISDA (PPR) dan satu jurutaip. Mereka inilah yang mengendalikan Desabakti agar ia berjalan dengan baik. Desabakti telah menubuhkan satu projek yang dikhaskan buat wanita pekebun kecil iaitu Karyadesa pada permulaannya Karyadesa dibiayai oleh Desabakti tetapi lama kelamaan oleh kerana bajangan tidak mencukupi maka Karyadesa telah diserahkan pada RISDA untuk mengendalikannya secara terus setelah diadakan mesyuarat pada 19th, Februari 1981. Antara isi penting ialah:

Mengambil alih Karyadesa daripada Desabakti dan menjadikannya sebagai pusat latihan wanita pekebun kecil getah. Oleh itu Karyadesa dengan rasminya telah ditubuhkan pada 1th, Mac 1981 yang ditadbir terus oleh pihak RISDA.

5.3 KARYADESA

Sebagai sebuah lagi projek untuk wanita pekebun kecil, Karya-
desa mempunyai dasar untuk memberi latihan pada pesertanya supaya
berkemahiran di dalam bidang yang diambilnya dan berkemampuan melahir-
kan karya-karya kraftangan dan hasil tangan yang bermutu.

Karyadesa mempunyai tiga buah pusat iaitu:

- i. Kuala Sungai Baru Melaka
- ii. Kota Mengkuang Kedah dan
- iii. Kampung Parit Serom Semerah, Johor.

Karyadesa di Kuala Sungai Baru Melaka merupakan yang pertama ditubuhkan
iaitu pada tahun 1980 iaitu semasa ianya di bawah Desabakti lagi. Di sini
juga terdapat Sekolah Latihan RISDA iaitu di Air Pak Abas yang digunakan
bagi peserta-peserta yang datang dari jauh tinggal di sini. Penekanannya
pada bidang jahitan manakala di Kuala Sungai Baru pula menekankan kepada
bidang jahitan dan tenunan.

Kota Mengkuang telah ditubuhkan pada 15hb. Mac 1982 yang
menekankan dalam bidang anyaman mengkuang manakala di Kampung Parit
Serom Semerah Johor ditubuhkan pada 16hb. April 1982 yang menekankan
bidang anyaman sahaja.

5.4 Tujuan KARYADESA

Karyadesa ditubuhkan atas tujuan-tujuan tertentu bagi mencapai
dasar yang ditentukan. Antara tujuan-tujuannya ialah:

Pertama, melatih dalam berbagai-bagai bidang kraftangan agar melahirkan pekerja-pekerja mahir yang dapat mengeluarkan pengeluaran yang bermutu.

Kedua, latihan kemahiran diberi akan dapat memberi pendapatan tambahan kepada para pekebun kecil sebagai pendapatan sampingan yang terjamin.

Ketiga, ia bertujuan untuk memperkembangkan seni handikraf secara kukuh dan bersungguh di kalangan wanita pekebun kecil lalu secara tidak langsung memberi pengetahuan pada orang ramai.

Akhir sekali, ianya ditubuhkan untuk memenuhi serta menyambut seruan kerajaan yang telah melaungkan berbagai-bagai tiori untuk meninggikan taraf pendapatan bumiputera. Oleh itu RISDA telah mengambil kesempatan ini sebagai pihak yang progresif dan tabah melaksanakan hasrat tersebut bagi pekebun kecil getah khasnya diadakan KARYADESA buat kaum wanita pekebun kecil.

5.5 Pentadbiran KARYADESA

Seperti FWPK, Karyadesa juga mempunyai pentadbiran tempatan bagi menjamin kelicinan dan kelancaran perjalanan projek tersebut. Pentadbiran ini penting untuk menjamin aktiviti-aktiviti projek supaya maju selalu.

Karyadesa ini ditadbirkan oleh RISDA secara langsung yang beribu pejabat di Kuala Lumpur. Di ibu pejabat, 2 orang pegawai RISDA

ditugaskan untuk menjaga segala aktiviti dan mengadakan berbagai rancangan bagi Karyadesa. Di sinilah segala urusan surat menyurat dihantar oleh cawangan-cawangan Karyadesa.

Di pusat-pusat Karyadesa tersebut ditempatkan seorang pegawai wanita RISDA yang bertugas sebagai penyelaras kepada perjalanan Karyadesa di bengkel-bengkel.

Guru-guru mahir samada orang tempatan atau orang luar akan membantu pegawai di RISDA ini dalam menyelaraskan perjalanan bengkel tersebut. Tugas guru-guru ini adalah semata-mata mengajar dan bukan sebagai ketua bagi keseluruhan aktiviti bengkel.

Bagi setiap bahagian misalnya bahagian anyaman dan lain-lain bahagian perlulah diadakan ketua masing-masing yang dapat berbincang dengan pihak pegawai RISDA sebagai penyelaras bengkel, untuk menyelesaikan apa-apa masalah dan mengawasi perjalanan dan aktiviti dengan baik.

Karyadesa tidak ditadbir oleh ahli-ahli di kalangan pekebun kecil kerana segala aktiviti adalah dirancang oleh RISDA dan peserta hanya datang untuk menerima latihan kemahiran sahaja.

Pegawai RISDA inilah yang memainkan peranannya dalam merancang perjalanan Karyadesa untuk dijadikan sebuah pusat latihan dan juga pusat pengeluaran di masa akan datang. Dalam merangkakan projek ini ianya memerlukan perhatian dan perbincangan yang luas sebelum ianya menjadi satu projek yang benar-benar berkesan dan memberi menafaat.

Perancangan oleh pegawai RISDA ini meliputi dua aspek iaitu:

Pertama, aspek pengeluaran seperti:

- bahan mentah
- kewangan atau akaun
- latihan
- pengawasan
- pemasaran dan lain-lain

Kedua, ialah dari aspek latihan seperti:

- kurikulum
- penilaian
- tiori
- praktikal
- kewangan dan lain-lain

Dalam melaksanakan perancangan tadi apa yang dipentingkan ialah penggunaan wang yang paling minima tetapi memberi hasil yang berkesan. Oleh itu tugas pegawai-pegawai di pusat itu sendiri amat penting untuk memastikan kelicinan perjalanan Karyadesa.

5.6 a. Perjalanan Bengkel

Pusat di mana kemahiran diajar pada peserta dipanggil bengkel. Perjalanan bengkel ini diawasi oleh dua orang penolong penyelaras yang terdiri daripada guru-guru yang mahir yang akan mengajar peserta-peserta. Peserta-peserta akan menjalankan pekerjaan mereka dengan kemahiran yang mereka perolehi dan dengan itu dapatlah pengeluaran dihasilkan.

Di Kuala Sungai Baru masa bekerja ialah pada pukul 8.00 pagi dengan menandatangani buku kedatangan yang perlu bagi memastikan disiplin dipatuhi dan juga kiraan elaun adalah berdasar pada kedatangan ini dan berakhir pada pukul 4.30 petang, pada hari Isnin hingga Jumaat tetapi pada hari Sabtu projek bermula dari pukul 8.00 pagi sehingga pukul 12.30 hari. Manakala pada hari Ahad adalah cuti am. Masa ini juga bagi Karyadesa di Kota Mengkuang Kedah dan Karyadesa Semerah Johor tetapi cuma di Syarikat Kraftangan KUSUBA jadual waktu untuk kegiatan mereka dari hari Isnin hingga hari Sabtu bermula dari pukul 8.00 pagi sehingga 5.00 petang.

5.6 h. Bahan Mentah

Bahan mentah disetorkan di sekolah latihan RISDA iaitu di Air Pak Abas di Melaka dan dihantar ke Kuala Sungai Baru jika diperlukan tetapi bagi Karyadesa yang lain bahan mentah itu akan dihantar terus ke sana. Bahan mentah ini akan digunakan apabila diperlukan bagi menjalankan projek-projek jahitan, tenunan dan lain-lain. Bahan mentah adalah seperti benang, pencelup dan lain-lain lagi. Adalah sangat digalakkan jika mana-mana pusat dapat menggunakan bahan mentah tempatan yang mana dapat mengurangkan kos.

Di bengkel tersebut serta rumah latihan RISDA, segala bayaran api, air dan sewa tanah diuruskan oleh pihak RISDA. Juga bayaran elaun bagi guru-guru dan peserta-peserta dibayar oleh RISDA dan selalunya pembayaran ini adalah diminimakan untuk mengurangkan perbelanjaan Karyadesa.

Bahan-bahan mentah selalunya dibeli dalam kuantiti yang besar

agar dapat harga yang murah. Pesanan barang-barang dan bahan mentah ini dibuat oleh pusat-pusat berkenaan dan dihantar kepada RISDA (Ibu Pejabat) secara bertulis yang mana surat-surat ini akan diteliti dan difailkan untuk kegunaan mereka di Ibu Pejabat. Setelah mendapat pesanan pihak RISDA di Ibu Pejabat akan membuat pesanan di kedai dan syarikat yang RISDA selalu berurus lalu dihantar ke pusat-pusat itu dengan kenderaan RISDA.

Setelah hasil-hasil pengeluaran siap seperti barang-barang anyaman, kalerai dan baju yang dijahit maka ia akan dihantar ke luar untuk dipasarkan. Dengan ini mereka akan menggunakan kenderaan RISDA tetapi terlebih dahulu perlu meminta kebenaran pihak RISDA negeri untuk menggunakan kenderaan itu. Setelah diluluskan baharulah barang-barang dibawa untuk dipasarkan oleh pihak RISDA sendiri.

Belanjawan Karyadesa ditetapkan oleh RISDA tetapi RISDA selalunya tidak menetapkan dengan tegas belanjawan setiap tahun kerana bergantung pada perjalanan Karyadesa itu sendiri. Selalunya di Kuala Sungai Baru akan diperuntukan lebih banyak kerana di sini aktiviti dan perjalanan bengkel adalah memuaskan.

Hasil yang telah siap akan dipamerkan oleh RISDA seperti menjualkannya pada kakitangan RISDA sendiri ataupun mengambil kesempatan untuk menjualkannya di Expo-expo dan pameran-pameran. Seperti Expo Kedah 1983 pada 28hb. Januari 1983 sehingga 23hb. Februari 1983, di Pesta Pulau Pinang pada setiap bulan Disember, di Ibu Pejabat RISDA di tingkat bawah pada 15hb. September 1981, di pameran Karyanika di

Kuala Lumpur serta lain-lain pameran yang diadakan.

Setelah barang-barang yang dapat dijual di Expo-expo dan pameran-pameran maka wang yang diterima akan diambil oleh RISDA dan 10% daripada hasil jualan dipulangkan pada peserta yang lain dan ini secara tidak langsung menambahkan pendapatan mereka juga memberi kemahiran. RISDA bertanggungjawab untuk mengambil sebahagian besar wang jualan adalah kerana RISDA yang menyediakan bahan mentah, membayar api dan letrik, membayar elaun peserta dan guru serta lain-lain yang dibiayai oleh RISDA.

5.7 Aktiviti KARYADESA

Karyadesa menjalankan aktiviti seperti jahitan khusus di sekolah latihan Pak Abas, anyaman, tenunan, songket, kelerai dan lain-lain kemahiran. Di setiap pusat Karyadesa peserta-peserta akan dikhususkan kepada bidang yang mereka minati.

walaupun Karyadesa diadakan di tiga buah pusat ini, yang kebanyakan mengambil orang-orang tempatan di situ, namun ada di kalangan peserta yang datang dari jauh seperti dari Kelantan, Perak, Trengganu, Pahang dan lain-lain lagi. Bagi peserta yang tinggal jauh ini mereka akan tinggal di asrama di sekolah latihan RISDA, manakala peserta yang berhampiran tinggal di rumah masing-masing.

Setakat ini semenjak dari penubuhan Karyadesa peserta-pesertanya berjumlah 104 orang yang dilatih di bawah Karyadesa. (Lihat lampiran.) dan kebanyakan peserta adalah mereka yang datang di mana pusat-pusat

tersebut diadakan iaitu di Melaka, Kota Mengkuang dan Semerah.

Latihan diadakan mengikut kumpulan-kumpulan tertentu. Misalnya kursus pertama bagi anyaman iaitu kumpulan pertama diadakan pada Mei 1980 dan berakhir pada 31hb. Mei 1982 iaitu selama 2 tahun bagi anyaman setelah kumpulan ini tamat maka akan diadakan pula kursus anyaman kedua bagi kumpulan yang baru pula. Begitu juga bagi bidang kemahiran yang lain yang diadakan secara berkumpulan untuk menyenangkan tenaga pengajar mengajar peserta-peserta.

Pengambilan peserta oleh Karyadesa ini adalah terbuka pada anak dan isteri atau kaum wanita pekebun kecil getah dan mereka ini akan di berikan latihan sepenuhnya sehingga mereka dapat membuat pengeluaran yang bermutu.

Pengambilan peserta-peserta tidaklah berdasarkan pada kelulusan akademik yang tinggi kerana adalah menjadi polisi Karyadesa untuk menolong anak desa pekebun kecil yang tidak maju di dalam pelajaran tetapi berminat di dalam seni yang boleh melatih mereka berdikari.

Sesiapa yang berminat terpaksa mengisi borang permohonan yang boleh didapati di Pejabat-pejabat RISDA negeri. Di dalam borang peserta dikehendaki mengisi butir-butir peribadi dan kemahiran yang mereka ada.

Setelah mengisikan borang maka satu pemilihan akan dilakukan oleh penolong pegawai RISDA dengan menemuduga para pemohon yang berminat. Bagi peserta-peserta yang datang dari Kelantan, Pahang, Trengganu dan lain-lain maka mereka akan ditemuduga di Pejabat RISDA negeri masing-masing. Apabila

peserta yang telah berjaya ditemuduga maka mereka dikehendaki pula mengisi borang kemasukan dengan mengisi semula hal peribadi, kelulusan dan lain-lain lagi.

Peserta-peserta ini akan dibahagikan mengikut kemahiran yang mereka pilih. Oleh kerana jangka masa kursus adalah agak panjang maka setengah-setengah peserta yang datang dari jauh akan ditempatkan di asrama. Di sini peserta disediakan dengan katil serta alat-alat kemudahan yang lain seperti talivisyen, peti sejuk dan lain-lain lagi. Jurulatih guru-guru juga tinggal di asrama mendapat elaun makan sebanyak \$7.50 sehari. Ada pegawai yang bertugas iaitu penolong penyelaras asrama yang mengawasi dan mengendalikan asrama ini. Pegawai ini akan tinggal bersama-sama dengan peserta dan bertanggungjawab dalam mengerjakan dan mengawasi kebajikan peserta. Elaun bagi penolong penyelaras ini adalah sebanyak \$200/- sebulan. Dua orang jaga juga ditempatkan di sini untuk mengawal keselamatan peserta dan penghuni asrama ini dengan bayaran elaun sebanyak \$135/- sebulan. Peserta-peserta bagi tiap-tiap bidang adalah merupakan satu bilangan yang kecil dan diberi elaun sebanyak \$120/- setiap bulan. Pemberian elaun ini adalah berdasarkan pada kedatangan peserta di bengkel. Bagi peserta yang tidak hadir selama sebulan maka nama mereka akan dipotong atau dikira tidak berminat lagi untuk menyertai latihan yang diberikan, manakala sesiapa yang hendak menarik diri dari kumpulan, diwajibkan memberitahu pihak yang berkenaan secara bersurat dengan memberi alasan-alasan yang baik.

Pihak RISDA tidak menentukan bilangan yang tetap pada tiap-tiap kumpulan tetapi selalunya RISDA tidak akan mengambil peserta yang

terlalu banyak memandangkan tenaga pengajar yang amat kurang.

Bagi tiap-tiap bidang yang berbeza jangkamasa kursus adalah berbeza. Ada di antara kursus yang dijalankan hampir setahun, adapula 6 bulan dan juga sebulan mengikut jenis kursus yang mereka ceburi. Bagi setengah kursus diadakan kursus orientasi dahulunya misalnya bagi peserta jahitan mereka akan menerima dua minggu orientasi di sekolah latihan Air Pak Abas dan juga beberapa minggu latihan memotong dan menjahit oleh guru yang mahir bagi peserta jahitan.

Kebanyakan peserta yang datang berkursus di Karyadesa adalah tidak mahir tetapi setelah mengikuti kursus maka mereka telah dapat menghasilkan pengeluaran sendiri. Tetapi bagi peserta-peserta dari Trengganu mereka ini terdiri daripada peserta yang agak mahir kerana mendapat latihan di Trengganu secara turun temurun. Kadangkala kedatangan mereka ini bukannya sebagai peserta tetapi juga menjadi tenaga pengajar. Mereka ini mahir dalam bidang anyaman dan tenunan kerana Trengganu seperti yang kita sedia maklum merupakan pusat anyaman di Malaysia dan kemahiran itu akan diturunkan kepada mereka oleh orang-orang yang lebih mahir.

Guru-guru yang melatih peserta adalah juga memohon sendiri dengan menyatakan kelayakan serta kemahiran yang mereka perolehi. Guru-guru tempatan dari kawasan itu juga ada dan tidak kurang juga tenaga pengajar mahir yang datang dari jauh. Kelayakan bagi guru-guru adalah seperti pernah menyertai Institut Kemahiran MARA (IKM), MAYC anjuran belia atau KEMAS ataupun kemahiran yang diperolehi sendiri.

Tenaga pengajar ini ada yang tetap dan ada juga yang sementara.

Guru-guru tetap akan mengajar secara tetap di bengkel-bengkel manakala guru sementara adalah dalam percubaan selama enam bulan. Guru-guru ini akan diberikan elaun yang berbeza mengikut kemahiran dan bidang yang mereka ajar. Bagi guru-guru anyaman elaunnya adalah sebanyak \$350/- sebulan manakala elaun guru-guru bagi tenunan adalah sebanyak \$250/- sebulan.

Karyadesa juga mempunyai jadual mereka yang tersendiri. Bagi kursus yang berbeza maka sukatan pelajaran mereka adalah berbeza dengan yang lain. Sukatan kursus yang paling lama sekali ialah anyaman tikar yang berlangsung selama enam bulan. Misalnya sukatan pelajaran bagi anyaman adalah seperti berikut:

1. Minggu Pertama

- A. Menenal pokok-pokok pandan dan mengkuang, jenis-jenis dan perbezaan antara pokok-pokok tersebut.
- B. Menenal alat-alat dan perkakas-perkakas yang digunakan untuk memproses daun-daun pandan dan mengkuang.
- C. Cara-cara memproses daun-daun pandan atau mengkuang.
 - i. Cara memilih daun-daun dan memotong
 - ii. Membuang duri dan melayur
 - iii. Membelah dengan menggunakan pengaringka
 - iv. Melurut dengan menggunakan pelurut.

2. Minggu Kedua

- A. Mempelajari dan mengenal jenis-jenis bahan pencelup
- B. Cara mencampurkan bahan-bahan tersebut untuk mendapatkan warna yang sesuai
- C. Cara-cara mencelup daun-daun pandan atau mengkuang

3. Minggu Ketiga

Di minggu ketiga, pelatih-pelatih mula diajar cara-cara mengator dan menganyam tikar biasa (gadah)

- A. Mempelajari peringkat permulaan serta cara-cara menggunakan daun
- B. Mempelajari susunan tepi
- C. Mempelajari cara-cara untuk mengatur warna yang sesuai pada anyaman tersebut.

4. Bulan Dua dan Tiga

- A. Mengenali jenis-jenis keleraian dan mempelajari cara-cara menganyam tikar keleraian yang mengandungi 44 jenis semuanya.

5. Bulan Keempat - Keenam

- A. Membuat berbagai bentuk barang anyaman setelah mengetahui jenis-jenis keleraian secara berperingkat
- B. Mempelajar dan membuat barang-barang dari contoh-contoh rekaan yang dikeluarkan oleh bahagian-

bahagian rekaan.

C. Cara membuat beg dengan menggunakan dasar kertas.

Setelah tamat latihan asal ini seorang peserta yang ingin memajukan dirinya bolehlah memohon untuk mengikuti kursus lanjutan ke peringkat kemahiran yang jangkamasanya ialah tiga hingga enam bulan. Dalam masa latihan kemahiran ini disediakan sukatan yang padat dan lengkap.

Kadangkala setelah penat menjalankan pekerjaan di bengkel mereka juga akan mengadakan lawatan sambil belajar. Misalnya peserta telah pergi ke Trengganu untuk melihat hasil kerja tangan orang-orang mahir di sana. Antara tempat yang dilawati ialah Pusat Latihan Lembaga Kraftangan di Kuala Trengganu dan juga kraftangan di Rusila untuk melihat cara membuat kipas, batik dan songket. Lawatan ini akan dibiayai oleh pihak IRSDA dan juga menyediakan perkhidmatan pengangkutan untuk mereka.

Selain daripada itu Karyadesa membuat lawatan, ia juga menerima lawatan dari sekolah-sekolah serta organisasi yang lain dengan tujuan untuk memperkenalkan Karyadesa dengan lebih dekat lagi pada orang ramai. Lawatan ini juga dapat menunjukkan pada orang ramai akan hasil seni yang dikeluarkan serta secara tak langsung dapat menambahkan pasaran Karyadesa.

Kesimpulannya segala "output" Karyadesa adalah ditanggung oleh RISDA dan dengan itu RISDA sedaya upaya meminimakan perbelanjaan disebabkan kemelesetan tetapi dengan harapan tidak matinya mana-mana pusat Karyadesa.

yang bertujuan untuk memberi kemahiran pada wanita pekebun kecil
supaya dapat mengeluarkan pengeluaran hasil daripada kemahiran yang
ada lantas menambahkan pendapatan.

